

# Gwrthrychau hynod





# Gwrthrychau hynod

## Breichrwym

Rhywbeth i'w ddefnyddio ynghyd â bwa a saeth yw'r strap lledr yma. Byddai'n cael ei wisgo am waelod y fraich, gan osod y rhan fawr addurnol dros y tu mewn i'r fraich.

Byddai'r breichrwym yn cadw'r fraich rhag cael ei brifo gan llyn y bwa neu blu'r saeth wrth saethu. Byddai'n cadw dillad rhydd rhag cael eu dal yn llinyn y bwa hefyd.

Roedd breichrwymau'n cael eu gwneud o ledr fel arfer, ond fe allen nhw gael eu gwneud o unrhyw ddefnydd caled, fel ifori neu gorn.

Yn oes y Tuduriaid, byddai saethwyr proffesiynol yn gwisgo breichrwymau addurnol wedi'u mowldio. Câi'r rhain eu gwneud o ledr wedi'i drwytho mewn olew berwedig. Roedden nhw'n galed ac yn gryf ac yn parhau am flynyddoedd, ac fe fydden nhw'n gorchuddio gwaelod y fraich i gyd.

Cafodd y breichrwym lledr meddal yma ei gynllunio i'w ddefnyddio'n fwy achlysurol, ac mae'n addurnol yn ogystal ag yn ymarferol.



### Sut rydyn ni'n gwybod am freichrwymau?

Darluniau a disgrifiadau mewn dogfennau Tuduraidd, a phethau sydd wedi'u canfod yn ystod gwaith cloddio archaeolegol. Cafodd breichrwymau tebyg i hwn, a breichrwymau o ledr wedi'i ferwi, eu codi o longddrylliad y *Mary Rose*, sef banerlong Edward VIII. Ceir enghraifft o freichrwym lledr wedi'i ferwi yng nghasgliad ar-lein yr Amgueddfa Brydeinig.



# Gwrthrychau hynod

## Canhwyllbren

Dyluniad o ganol yr unfed ganrif ar bymtheg sydd i'r ganhwyllbren arian yma, yn unswydd i'w defnyddio ar fwrdd. Mae ganddi badell i ddal diferion cwyr, i'w cadw rhag gwneud difrod i lieiniau drud.

Cyn canol yr unfed ganrif ar bymtheg, roedd canhwyllbrenni naill ai'n sefyll ar dair coes heb badell diferion, neu ceid padell diferion ar waelod y ganhwyllbren i ddal y diferion wrth ichi gario'r ganhwyllbren.

Yng nghyfnod y Tuduriaid, roedd golau'n dod o fflaglau, y tân, canhwyllau gwêr a chanhwyllau brwyn. Dim ond mewn adeiladau mawr o garreg fel cestyll ac eglwysi yr oedd fflaglau'n addas; roedd golau'r tân yn rhy wan i ddarllen neu weithio wrtho; felly roedd y rhan fwyaf o bobl gyffredin yn defnyddio canhwyllau gwêr neu ganhwyllau brwyn.

Byddai'r bobl dlotaf yn defnyddio canhwyllau brwyn, oedd yn cael eu creu drwy drochi brwyn mewn braster cig oen neu olew, a chanhwyllau rhad

wedi'u gwneud o wêr (sef braster anifeiliaid wedi'i rendro). Doedd y canhwyllau hyn ddim yn rhoi golau cryf na chyson, ac roedden nhw'n drewi wrth losgi.

Roedd pobl gyfoethog yn defnyddio canhwyllau oedd wedi'u gwneud drwy drochi wic o liain mewn cŵyr gwenyn. Roedd y canhwyllau hyn yn llogi'n llachar ac yn gyson, ac yn creu aroglau pêr wrth losgi.



### Sut rydyn ni'n gwybod am ganhwyllbrenni â phadellau diferion?

Darluniau a disgrifiadau mewn dogfennau Tuduraidd, a phethau sydd wedi'u canfod yn ystod gwaith cloddio archaeolegol. Mae canhwyllbrenni tebyg i'w gweld mewn amgueddfeydd a thai hanesyddol.



# Gwrthrychau hynod

## Modrwy ddegawd

Byddai'r fodrwy yma o haearn bwrw yn cael ei defnyddio i helpu pobl i weddio. Mae'n cael ei galw'n fodrwy ddegawd am fod arni ddeg 'bwlyn' bach a 'gwefl' (y bwlyn mwyaf). Mae'r rhain yn cynrychioli 'degawd' o weddïau. Byddai'r Ave Maria (Gweddi Mair) yn cael ei hadrodd un waith ar gyfer pob un o'r byliau, ac wedyn y Paternoster (Gweddi'r Arglwydd) ar gyfer y wefl.

Mae'r modrwyon yn edrych yn anghyffyrddus iawn, ond o'u gwisgo am y bawd maen nhw'n syndod o gysurus.

O ganol y bymthegfed ganrif ymlaen, roedd llun sant neu lythrennau blaen enw'r perchennog yn cael eu cynnwys ar y wefl ar lawer o fodrwyon degawd.

Rhwng 1534 a 1554, ac wedyn rhwng 1570 a 1578, roedd Catholigiaeth wedi'i gwahardd. Ym 1571 daeth yn anghyfreithlon defnyddio'r llaswyr, a gallai gwisgo llaswyr arwain at eich cosbi, eich anfon i'r

carchar neu hyd yn oed eich dienyddio. Parhaodd llawer o Gatholigion i addoli yn gyfrinachol, gan wisgo neu gario modrwyon degawd, oedd heb gael eu gwahardd gan y gyfraith.



### Sut rydyn ni'n gwybod am fodrwyon degawd?

Darluniau a disgrifiadau mewn llawysgrifau, a phethau sydd wedi'u canfod yn ystod gwaith cloddio archaeolegol. Roedd modrwyon degawd yn cael eu gwneud tan o leiaf y ddeunawfed ganrif, ac amgueddfa Lerpwl sydd â'r casgliad gorau yn y Deyrnas Unedig.





# Gwrthrychau hynod

## Dirwynydd

Mae gan y teclyn pren yma far canolog, a dau groesfar ym mhob pen, a'r rheiny ar ongl o 90° i'w gilydd. Byddai dirwynydd fel hyn yn cael ei ddefnyddio i ddirwyn cenglau o edafedd, drwy afael yn y bar canolog a dirwyn yr edafedd mewn cylch o amgylch pedair 'cornel' y dirwynydd. Mae pen un o'r croesfarrau yn wastad ar ei ochr, i'w gwneud yn haws i'r gengl gael ei thynnu.

Roedd angen i edafedd gael eu codi oddi ar y werthyd neu oddi ar y bobin ar y droell nyddu, a'u dirwyn yn genglau yn barod i gael eu golchi, eu lliwio, eu storio neu eu gwerthu. Gallech wneud cenglau o'r un faint á'i gilydd drwy gyfrif sawl gwaith roedd yr edafedd yn cael eu dirwyn o amgylch y dirwynydd.

Yng nghyfnod y Tuduriaid, roedd edafedd yn cael eu gwneud o wĺan, neu o ffeibrau llysiâu fel lliain, cywarch neu ddanadl.



### Sut rydyn ni'n gwybod am ddirwynwyr?

Darluniau a disgrifiadau mewn llawysgrifau, a phethau sydd wedi'u canfod yn ystod gwaith cloddio archaeolegol. Mae darlun Pieter Pietersz o 1570: *Dyn a Dynes wrth y Droell Nyddu* yn dangos dirwynydd yn glir. Mae dirwynyddion yn dal i gael eu defnyddio heddiw.



# Gwrthrychau hynod

## Llaswyr

Yr enw ar y llinyn yma o leiniau asgwrn a phren yw llaswyr. Mae dwy ystyr i'r gair llaswyr: mae'n golygu cyfres o weddïau mewn trefn a hefyd y llinyn o leiniau sy'n cael ei ddefnyddio i gyfri'r gweddïau.

Roedd llawer o fathau o laswyrâu, bob un ar gyfer cyfres wahanol o weddïau. Ar y llaswyr yma mae 40 o leiniau gwyn yn cynrychioli'r Ave Maria (Gweddi Mair), ac mae'r pum glain du yn cynrychioli'r Paternoster (Gweddi'r Arglwydd). Byddai pob glain yn cael ei gyffwrdd yn ei dro a byddai'r weddi briodol yn cael ei hadrodd. Byddai'n cymryd tua deg munud i adrodd y llaswyr yma ac roedd yr Eglwys Gatholig Rufeinig yn credu bod hynny'n benyd effeithiol (sef gweithred o edifarhau am eich pechodau).

Cafodd gweddïo â llaswyr ei wahardd gan y Brenin Henry VIII ym 1538. Adferodd y Frenhines Mary Gatholigiaeth yng Nghymru, Lloegr ac Iwerddon

rhwng 1553 a 1558, ond cafodd Catholigiaeth ei gwahardd eto o dan Elizabeth I ym 1570, a chafodd y llaswyr ei gwahardd ym 1571.



### Sut rydyn ni'n gwybod am laswyrâu?

Darluniau a disgrifiadau mewn dogfennau Tuduraidd, a phethau sydd wedi'u canfod yn ystod gwaith cloddio archaeolegol. Cafodd llaswyrâu eu codi o longddrylliad y *Mary Rose*, banerlong Edward VIII, a chopi o un o'r rheiny yw hwn. Mae llaswyrâu'n dal i gael eu defnyddio gan Gatholigion heddiw.



# Gwrthrychau hynod

## Gwahanydd

Mae llawer o dyllau wedi'u creu yn y darn crwn yma o ledr. Roedd y tyllau mân o amgylch yr ymyl yn fodd i'r gwahanydd gael ei wnïo i mewn i gawell saethau. Roedd y tyllau mawr yn y canol yn cadw bwlch rhwng pob saeth yn y gawell, gan atal y plu ar y saethau rhag cael eu gwasgu neu eu difrodi. Roedd hynny'n bwysig iawn am nad yw'r saeth yn hedfan yn gywir os yw'r plu wedi cael niwed.



### Sut rydyn ni'n gwybod am wahanyddion?

Darluniau a disgrifiadau mewn dogfennau Tuduraidd, a phethau sydd wedi'u canfod yn ystod gwaith cloddio archaeolegol. Cafodd gwahanyddion saethau eu codi o longddyliad y *Mary Rose*, banerlong Edward VIII, a chopi o un o'r rheiny yw hwn.

